

## CONVENIO DE COLABORACIÓN ENTRE A AXENCIA DE TURISMO DE GALICIA E A ASOCIACIÓN DE CLUBS NÁUTICO DE GALICIA – ASNAUGA PARA A REALIZACIÓN DO 6º SIMPOSIO DE CLUBS NÁUTICOS

### REUNIDOS

Dunha parte, D. José Manuel Merelles Remy, director da **Axencia de Turismo de Galicia**, en virtude do nomeamento efectuado polo Decreto 75/2024, do 22 de abril (DOG núm. 81, do 24 de abril), e conforme ás facultades que lle confire o apartado dous da disposición adicional segunda do Decreto 135/2024, do 20 de maio, de estrutura orgánica dos órganos superiores e de dirección dependentes da Presidencia da Xunta de Galicia (DOG núm. 101, do 27 de maio), que desconcentra na titular da Dirección da Axencia a competencia para subscribir convenios de colaboración no seu respectivo ámbito competencial, de acordo co previsto no artigo 15.2.c) dos estatutos da Axencia de Turismo de Galicia, aprobados polo Decreto 196/2012, do 27 de setembro (DOG núm. 193, do 9 de outubro).

E pola outra, D. Javier Ruíz de Cortázar Díaz, en calidade de presidente da **Asociación de Clubs Náuticos de Galicia**– en adiante ASNAUGA, con CIF G-15916547, con domicilio social en R/ Ourense, 11, baixo, 15701, Santiago de Compostela (A Coruña).

Interveñen en función dos seus respectivos cargos e en exercicio das facultades que para convir en nome das entidades que representan teñen conferidas

### EXPOÑEN

**Primeiro.-** Que a Axencia de Turismo de Galicia, en virtude do disposto no artigo 1 do Decreto 196/2012, do 27 de setembro, polo que se crea a Axencia de Turismo de Galicia e se aproban os seus estatutos, é a axencia pública autonómica que ten como obxectivo impulsar, coordinar e xestionar a política autonómica en materia de turismo e, en especial, a promoción e ordenación do turismo dentro da comunidade.



Para lograr esta finalidade a Axencia de Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.

**Segundo.-** Que a Asociación de Clubs Náuticos de Galicia, é unha institución sen ánimo de lucro. Constitúese o 20 de febreiro de 2003, sendo a única asociación empresarial existente en Galicia representativa deste sector, rexistrada na Consellería de Economía, Emprego e Industria, implantada en toda Galicia, e formada por 31 entidades náuticas cuxo obxectivo é promocionar e comercializar o turismo náutico en Galicia.

A defensa e promoción dos clubs náuticos galegos, foi uns dos incentivos que motiva a creación da Asociación. Así mesmo, outro dos obxectivos de ASNAUGA, é axudar a potenciar o turismo náutico deportivo nas costas de Galicia, conscientes da súa singularidade, as inigualables características para as actividades náutico-deportivas que teñen as nosas rías e costas en xeral, promoveu e potenciou aplicación de certificacións medio ambientais e de calidade, contando na actualidade con:

O 80 % das bandeiras azuis de Galicia

O 92,31 % das certificacións "Q" de Calidade e 57,14% de España.

O 100 % das certificacións EMAS de Galicia

O 100 % das ISO 14001 de Galicia

O 92,31 % das certificacións de Galicia calidade en portos deportivos

ASNAUGA ten entre os seus fins o de manter e fomentar, como creadores e prestadores de servizos de infraestruturas portuarias, un turismo de calidade e accesible que permita diversificar a oferta turística existente e favorecer o desenvolvemento estable do sector náutico e da economía galega, e de todo tipo de actividades deportivas relacionadas co mar e a súa formación especializada.

**Terceiro.-** ASNAUGA xunto coa CEACNA (Confederación Española de Asociacións de Clubs Náuticos) van a organizar este ano o 6º simposio de clubs náuticos en Galicia,



concretamente na vila de Sanxenxo, os días 3 e 4 de outubro de 2025. As datas foron escollidas para conseguir unha maior eficiencia, evitar duplicidades con outros eventos, e desestacionalizar os eventos náuticos.

A temática a desenvolver é variada, pero está enfocada cara o “Turismo náutico como fomento do deporte e a náutica social”, aspectos que se consideran fundamentais entre os clubs náuticos, entidades sen ánimo de lucro e xeradores de actividades náutico-deportivas, que conseguiron logros importantes ó longo da historia deportiva galega e española, como medallas olímpicas e campionatos tanto españois, como europeos ou mundiais.

Galicia é un potencial neste tipo de deportes e actividades. Así mesmo, a nosa Comunidade Autónoma é a que conta con máis certificacións de calidade e medio ambiente en portos deportivos de toda España, polo que proxectouse a organización deste evento na nosa Comunidade Autónoma.

Este evento reunirá a representantes de clubs náuticos de toda España para discutir os desafíos e oportunidades do sector náutico no século XXI, e estímase que acudirán sobre 160/175 persoas representando a máis de 70 clubs náuticos e mariñas de todo o territorio español, ademais de federacións deportivas náuticas, consultores, especialistas e técnicos en materia portuaria, de turismo e da administracións.

Durante o simposio abordaranse temas clave como a Lei de Portos do Estado, as prórrogas e ampliacións, a nova lexislación sobre náutica deportiva, a fiscalidade e a sostibilidade no sector náutico, as estratexias para fomentar a participación dos mozos e sumar afeccionados ós deportes náuticos e a náutica social como sinal de identidade dos clubs náuticos.

O evento contará coa participación de expertos en diversas áreas, incluíndo a xestión deportiva, a enxeñería mariña e a economía do sector náutico. Tamén se realizarán mesas de debate para facilitar o intercambio de ideas e experiencias entre os asistentes.



**Cuarto.-** Que, polas razóns expostas, concorren aos efectos do establecido nos artigos 19.4.c) e 26.2 a) da Lei 9/2007, do 13 de xuño, de subvencións de Galicia, e 36.c) e 40.1a) do Regulamento da dita lei, aprobado polo Decreto 11/2009, do 8 de xaneiro, razóns de interese público para o outorgamento da subvención, posto que o obxecto do convenio contribúe á valorización do patrimonio cultural e natural, tanto material como inmaterial, o desenvolvemento do turismo costeiro, e a promoción internacional de Galicia como destino náutico e natural de costa.

Deste xeito concorren así, razóns de interese público que xustifican o outorgamento dunha subvención sen que proceda promover a concorrencia pública ao ser ASNAUGA a única entidade que pode desenvolver á actuación subvencionada.

Por todo isto, dada a converxencia de ámbitos de actuación, o mutuo interese en xuntar esforzos na consecución duns fins comúns, e para unha maior eficacia na execución das actuacións, as partes asinantes, en virtude da representación coa que interveñen, acordan a subscripción do presente convenio, de acordo coas seguintes

## CLÁUSULAS

### **Primeira.- Obxecto do convenio.**

Constitúe o obxecto do presente convenio a o establecemento das condicións para a colaboración entre a Axencia de Turismo de Galicia e a Asociación de Clubs Náuticos de Galicia – ASNAUGA para a realización do 6º simposio de clubs náuticos, que terá lugar os días 3 e 4 de outubro de 2025 na vila de Sanxenxo.

### **Segunda.- Orzamento e financiamento.**

O orzamento estimado para a realización das actuacións previstas neste convenio ascende a 68.193,36 € (IVE incluído), que se distribúen da seguinte maneira:



Concepto	Parcial	IVE	Total
<b>Coordinación</b>			<b>9.118,70 €</b>
Persoal e colaboradores	7.945,00 €		
Gastos de xestión, alugueiros e admon.	300,00 €	63,00 €	
RC	670,00 €	140,70 €	
<b>Loxística</b>			<b>8.103,42 €</b>
Equipamento sala / auxiliares	4.700,30 €	987,06 €	
Alugueiro salas	991,74 €	208,27 €	
Vehículos / taxis	1.005,00 €	211,05 €	
<b>Viaxes / manutención</b>			<b>38.481,85 €</b>
Avión / coche	5.575,00 €	1.170,75 €	
Habitación hotel	2.896,00 €	289,60 €	
Comidas / ceas	18.930,00 €	1.893,00 €	
Recepción	4.960,00 €	496,00 €	
Actividades acompañantes	2.065,00 €	206,50 €	
<b>Obsequios a invitados / participantes</b>			<b>4.356,00 €</b>
Carpeta congresistas	1.970,00 €	413,70 €	
Obsequios invitados	1.080,00 €	226,80 €	
Serigrafía	550,00 €	115,50 €	
<b>Imprenta</b>			<b>3.146,00 €</b>
Credenciais	500,00 €	105,00 €	
Soporte dixital	2.100,00 €	441,00 €	
<b>Publicidade</b>			<b>2.141,70 €</b>
Bandeirolas verticais	620,00 €	130,20 €	
Carteis e pancartas presentación	1.150,00 €	241,50 €	
<b>Comunicación</b>			<b>1.815,00 €</b>



Vídeo	700,00 €	147,00 €	
Prensa	800,00 €	168,00 €	
<b>Outros</b>	1.030,69 €		<b>1.030,69 €</b>
<b>TOTAL</b>	<b>60.538,73 €</b>	<b>7.654,63 €</b>	<b>68.193,36 €</b>

Deste orzamento, a Axencia de Turismo de Galicia financiará a contía de **27.830,00 €** (IVE incluído). Esta achega da Axencia só cubrirá o custo de realización da actividade, sen que ASNAUGA obteña beneficio ou lucro industrial algún coa devandita achega.

A Axencia de Turismo de Galicia procederá ao pago dos gastos correspondentes con cargo á aplicación orzamentaria 04.A2.761A.781.0, código de proxecto 2015 00005, dos orzamentos xerais da Comunidade Autónoma de Galicia para o ano 2025.

### **Terceira. Gastos subvencionables.**

De acordo co previsto no artigo 29 da Lei 9/2007, do 13 de xuño, consideraranse subvencionables os gastos que, sen admitir dúbida, respondan á natureza da actividade subvencionada de acordo coa previsión de orzamento recollida na cláusula segunda e que se realicen a partir do **1 de xaneiro de 2025**. En ningún caso o custo de adquisición dos gastos subvencionables poderá ser superior ao valor de mercado.

Para estes efectos, considerárase gasto realizado o que foi efectivamente pagado con anterioridade á finalización do referido prazo de xustificación. Exceptúanse aqueles gastos cuxos pagamentos deban efectuarse nun momento posterior por axustarse aos calendarios de recadación, como os ingresos a conta do IRPF ou cotas por seguros sociais liquidables con posterioridade á data de xustificación. O importe destes ingresos ou cotas considerárase xustificadas coa presentación do documento de gasto (factura ou documento equivalente) en que se reflecta o importe de retención ou cotizacións devindicadas na data de xustificación. A Asociación quedará obrigada a presentar os documentos acreditativos da súa liquidación nos dez días seguintes ao remate dos prazos legalmente establecidos para o seu ingreso no período voluntario.



O importe correspondente ao IVE só poderá ser imputado ao convenio na contía que non sexa recuperada ou compensada pola Asociación, o cal deberá ser acreditado por esta coa xustificación do convenio.

Os gastos financeiros, os gastos de asesoría xurídica ou financeira, os gastos notariais e rexistrals e os gastos periciais para a realización do proxecto subvencionado recollidos no artigo 29 da Lei 9/2007, do 13 de xuño, de subvencións de Galicia, non serán subvencionables.

#### **Cuarta.- Compromisos das partes.**

I. ASNAUGA queda obrigada á execución das referidas actuacións e a realizar todas as actividades necesarias para que as actuacións do convenio de colaboración se desenvolvan correctamente.

Así mesmo, comprométese a:

- Desenvolver as actuacións recollidas nas cláusulas primeira e segunda deste convenio, e que constitúen o seu obxecto, e xustificar a realización e o cumprimento da finalidade que determinou a concesión da subvención.
- Incluír en toda a documentación e soportes específicos para o evento que se trata dunha actuación con financiamento da **Xunta de Galicia**.

Nos materiais impresos, medios electrónicos ou audiovisuais, ou ben en mencións realizadas en medios de comunicación deberán constar lendas relativas ao da Xunta de Galicia.

Igualmente, a entidade beneficiaria deberá incluír nas súas accións promocionais a **marca turística de Galicia**, de acordo co Decreto 121/2011, do 16 de xuño, polo que se aproba a marca turística de Galicia e se regula a súa utilización (DOG núm. 125, do 30 de xuño).



- Achegar a información que lle sexa requirida pola Intervención Xeral da Comunidade Autónoma, o Consello de Contas e o Tribunal de Contas no exercicio das súas funcións de fiscalización e control do destino do investimento.
- Presentar, con anterioridade á firma do convenio, as certificacións de estar ao corrente das súas obrigacións tributarias e sociais e de non ter débedas pendentes por ningún concepto coa Xunta de Galicia, así como unha declaración responsable de non estar incurso en ningunha das prohibicións para obter a condición de beneficiario, establecidas no artigo 10 da Lei de subvencións de Galicia.
- Comunicar á Axencia de Turismo de Galicia a obtención doutras subvencións, axudas, ingresos ou recursos que financien a actividade subvencionada procedentes de calquera administración ou entes públicos ou privados nacionais ou internacionais. Esta comunicación deberá efectuarse tan pronto como se coñeza e en todo caso, con anterioridade á xustificación da aplicación dos fondos recibidos.
- Subministrar á Axencia de Turismo de Galicia, en virtude do disposto no artigo 4 da Lei 1/2016, do 18 de xaneiro, de transparencia e bo goberno, previo requirimento, toda a información necesaria para o cumprimento pola Axencia das obrigacións previstas no Título I da citada lei.
- Todas as demais obrigacións establecidas no artigo 11 da Lei de subvencións de Galicia.

II. A Axencia de Turismo de Galicia comprométese a colaborar no financiamento do custo das actividades previstas a través da achega establecida na cláusula segunda.

#### **Quinta.- Inexistencia de relación laboral.**

A subscrición deste convenio non implicará relación laboral, contractual ou de calquera outro tipo entre os profesionais que desenvolvan as actividades e a Axencia de Turismo de Galicia, de tal modo que non se lle poderá esixir responsabilidade algunha directa nin subsidiariamente polos actos ou feitos acaecidos no desenvolvemento deste.



#### **Sexta.- Compatibilidade.**

De conformidade co disposto no artigo 40.1 d) do Regulamento da Lei 9/2007, do 13 de xuño, de subvencións de Galicia, aprobado polo Decreto 11/2009, do 8 de xaneiro, a achega económica prevista neste convenio será compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou organismos internacionais.

En ningún caso o importe das subvencións as que se refire o parágrafo anterior poderá superar, no seu conxunto, cústeo da actividade subvencionada, ao amparo do disposto no artigo 17.3 da Lei 9/2007, do 13 de xuño, de subvencións de Galicia.

#### **Sétima.- Comisión de seguimento.**

Coa finalidade de asegurar o cumprimento deste convenio, crearase unha comisión paritaria que estará integrada por representantes de cada unha das entidades asinantes, ostentando a presidencia un dos representantes da Axencia de Turismo de Galicia.

A Comisión terá as seguintes funcións:

- a) Facer o seguimento e control do desenvolvemento do convenio.
- b) Propoñer a interpretación e resolución das dúbidas que se poidan suscitar na aplicación do convenio.

Está Comisión actuará segundo o previsto no Capítulo II do Título Preliminar da Lei 40/2015, do 1 de outubro, do réxime xurídico do sector público.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida serán resoltas pola persoa titular da Dirección da Axencia de Turismo de Galicia.

#### **Oitava.- Modificacións do convenio.**



As modificacións do convenio adoptaranse por acordo expreso e escrito das partes asinantes e de acordo cos trámites que esixa a normativa vixente.

Toda alteración das condicións tidas en conta para a concesión da subvención dará lugar á modificación do convenio, sendo de aplicación das previsións ao respecto contidas na Lei 9/2007, do 13 de xuño, e no regulamento de dita lei.

Así mesmo, e de conformidade co disposto no artigo 31.4 da Lei 14/2013, do 26 de decembro, de racionalización do sector público autonómico, os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira.

#### **Novena.- Natureza xurídica, réxime xurídico e xurisdición competente.**

Este convenio ten natureza administrativa, e queda fóra do ámbito da Lei 9/2017, do 8 de novembro, de contratos do sector público, que o exclúe expresamente no artigo 6.

Seralle de aplicación o réxime determinado pola Lei 9/2007, do 13 de xuño, de subvencións de Galicia; o Decreto 11/2009, do 8 de xaneiro que a desenvolve; os preceptos básicos da Lei 38/2003, do 17 de novembro, xeral de subvencións, e do Real decreto 887/2006 que a desenvolve; a Lei 1/2016, do 18 de xaneiro, de transparencia e bo goberno; a Lei 39/2015, do 1 de outubro, do procedemento administrativo común das administracións públicas; na Lei 40/2015, do 1 de outubro, de réxime xurídico do sector público, e polas demais normas de dereito administrativo aplicables e, na súa falta, polas normas de dereito privado.

As controversias derivadas da aplicación ou interpretación do presente convenio serán resoltas en última instancia pola persoa titular da Dirección da Axencia de Turismo de Galicia, cuxas resolucións poñen fin a vía administrativa. Será competente a xurisdición contencioso-administrativa para resolver na vía xurisdiccional as citadas controversias.



### Décima.– Xustificación do convenio e pagamento.

I. A xustificación dos fondos efectuarase segundo a modalidade de **conta xustificativa**, de acordo co previsto nos artigos 28 da Lei 9/2007, do 13 de xuño, de subvencións de Galicia e o artigo 48 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño que a desenvolve, que conterá a seguinte documentación:

1) Memoria de actuación, xustificativa do cumprimento das condicións impostas na concesión da subvención, con indicación das actividades realizadas e dos resultados obtidos.

2) Unha memoria económica xustificativa do custo das actividades realizadas, que conterá:

a) Unha relación clasificada dos gastos e investimentos da actividade, con identificación do acredor e do documento, o seu importe, data de emisión e, no seu caso, data de pagamento.

b) Facturas ou documentos de valor probatorio equivalente no tráfico xurídico-mercantil ou con eficacia administrativa incorporados na relación á que se fai referencia no apartado anterior e a documentación acreditativa do pago. No caso de tratarse de gastos inferiores a 1.000 € poderá xustificarse o pagamento mediante recibo do provedor.

c) Os documentos acreditativos dos gastos realizados con medios ou recursos propios e a indicación, no seu caso, dos criterios de reparto dos custos xerais e/ou indirectos incorporados na relación á que se fai referencia na letra a).

d) Unha relación detallada doutros ingresos ou subvencións que financien a actividade subvencionada con indicación do importe e a súa orixe.

e) Os tres orzamentos que, en aplicación do artigo 29.3 da Lei de subvencións de Galicia, deba solicitar o beneficiario.

f) No seu caso, a carta de pago de reintegro no suposto de remanentes non aplicados así como dos intereses derivados destes.



Así mesmo, deberá remitirse o detalle da documentación e soportes publicitarios nos que consten a colaboración da Xunta de Galicia e a marca turística de Galicia.

3) Certificación bancaria de titularidade da conta na que se deba realizar o pagamento.

Doutra banda, a entidade beneficiaria deberá acreditar que se atopa ao corrente no cumprimento dos seus deberes tributarios e fronte á Seguridade Social e que non ten pendente de pago ningunha outra débeda coa Administración pública da Comunidade Autónoma.

A documentación correspondente á xustificación presentarse de forma electrónica a través da sede electrónica da Xunta de Galicia (<http://sede.xunta.gal>).

II. A achega da Axencia de Turismo de Galicia minorarase proporcionalmente no caso de que non se xustifique o orzamento total estimado que figura na cláusula segunda, a condición de que se consiga o obxecto do convenio.

Con todo, non se entenderá incumplido o deber de xustificación das actuacións obxecto deste convenio no caso de variacións das contías previstas nas distintas partidas establecidas no orzamento estimado na cláusula segunda, cando obedezan a razóns xustificadas e as actuacións que se levaron a cabo garden relación directa co obxecto do presente convenio.

III. A comunicación relativa á obtención doutras subvencións, axudas, ingresos ou recursos para a mesma finalidade, así como a modificación das circunstancias que fundamentasen a concesión da subvención, deberá efectuarse no momento no que se coñeza e, en todo caso, con anterioridade á xustificación da aplicación dada aos fondos percibidos.

Cando as actuacións obxecto do convenio fosen financiadas, ademais de con a subvención, con fondos propios ou doutras subvencións ou recursos, deberá acreditarse na xustificación o importe, a orixe e a aplicación de tales fondos ás actividades



subvencionadas, de conformidade co establecido no artigo 28.6 da Lei 9/2007, do 13 de xuño, de subvencións de Galicia.

IV. Á vista desta documentación, o órgano competente da Axencia de Turismo de Galicia, expedirá certificación acreditativa do cumprimento dos fins obxecto do convenio e tramitará o seu pago.

Para estes efectos, considerarase gasto realizado o que foi efectivamente pagado con anterioridade á finalización do referido prazo de xustificación. Exceptúanse aqueles gastos cuxos pagos deban efectuarse nun momento posterior por axustarse aos calendarios de recadación, como os ingresos a conta do IRPF ou cotas por seguros sociais liquidables con posterioridade á data de xustificación. O importe destes ingresos ou cotas considerarase xustificado coa presentación do documento de gasto (factura ou documento equivalente) en que se reflicta o importe de retención ou cotizacións devindicadas na data de xustificación. A entidade beneficiaria quedará obrigada a presentar os documentos acreditativos da súa liquidación nos dez días seguintes ao final dos prazos legalmente establecidos para o seu ingreso no período voluntario.

V. O prazo para presentar a documentación xustificativa por parte da Asociación e realizar a execución do obxecto do convenio será dende a súa formalización ata o **30 de novembro de 2025**.

A documentación correspondente á xustificación presentarase de forma electrónica a través da sede electrónica da Xunta de Galicia (<https://sede.xunta.gal>).

#### **Décimo primeira.- Pagamentos anticipados e pagamentos a conta**

Poderanse realizar pagamentos anticipados que suporán entregas de fondos con carácter previo á xustificación, como financiamento necesario para levar a cabo as actuacións obxecto deste convenio. Os pagamentos anticipados serán de ata o 50% do importe que se obriga a achegar a Axencia de Turismo de Galicia, de conformidade co disposto no artigo 63.1.Dous do Decreto 11/2009, do 8 de xaneiro, polo que se aproba o Regulamento da Lei de subvencións de Galicia.



Así mesmo poderanse realizar pagos a conta que poderán supoñer a realización de pagos fraccionados que responderán o ritmo de execución das accións realizadas. Para proceder ao seu pago, a entidade beneficiaria deberá enviar a documentación xustificativa relacionada na cláusula décima.

A suma dos pagos anticipados e a conta non será superior ao 80% da porcentaxe correspondente aos pagos xustificados, conforme establece o artigo 62 do citado Regulamento.

Coa solicitude de anticipo a Asociación deberá presentar as certificacións de estar ao corrente das súas obrigas tributarias e fronte á Seguridade Social e de non ter pendente de pago débedas por ningún concepto coa Administración pública da Comunidade Autónoma. Así mesmo, deberá xuntar declaración de obtención doutras subvencións, axudas, ingresos ou recursos que financien as actividades subvencionadas.

De conformidade co disposto nos artigos 65 e 67 do Regulamento da Lei 9/2007, do 13 de xuño, de subvencións de Galicia, aprobado polo Decreto 11/2009, do 8 de xaneiro, para a realización dos pagamentos anticipados e a conta a Asociación terá que constituír unha garantía que deberá cubrir o 110% do importe das cantidades aboadas á conta ou das cantidades anticipadas, cando a súa contía acumulada supere os 18.000 €.

#### **Décimo segunda.- Perda do dereito ao cobramento da subvención.**

1. Producirase a perda do dereito ao cobramento da subvención nos supostos de falta de xustificación, xustificación incompleta ou insuficiente, deficiencias non emendables na documentación xustificativa, incumprimento das obrigas impostas á entidade beneficiaria neste convenio ou concorrencia dalgunha das causas previstas no artigo 33 da Lei de subvencións de Galicia e demais lexislación aplicable, sen prexuízo do previsto nos artigos 45.2 e 46 do Decreto 11/2009, do 8 de xaneiro.



2. Ademais de calquera outra causa que derive da normativa aplicable, constitúen en todo caso un incumprimento das obrigas impostas á entidade beneficiaria neste convenio as seguintes:

a) Non acreditar a execución do proxecto subvencionado antes da finalización do prazo de xustificación e/ou non presentar toda a documentación xustificativa no tempo e na forma esixibles, de conformidade co previsto nas cláusulas deste convenio e demais normativa de aplicación.

b) Incumprimento das condicións establecidas para a concesión da subvención.

3. A perda do dereito será total ou parcial, segundo afecte todas ou algunhas das actuacións que integran o proxecto que fundamenta a resolución de concesión.

#### **Décimo terceira.- Subcontratación.**

Poderán ser obxecto de subcontratación, total ou parcial, as actividades subvencionadas a través deste convenio, tendo en conta o disposto nesta cláusula e de acordo co establecido no artigo 27 da Lei 9/2007, do 13 de xuño, de subvencións de Galicia. En todo caso quedan fora da subcontratación aqueles gastos nos que teña que incurrir a entidade beneficiaria para a realización por si mesma da actividade subvencionada.

A necesidade da subcontratación estará debidamente motivada pola entidade beneficiaria e, en ningún caso, suporá un aumento do custo da actividade subvencionada.

Os subcontratistas quedarán obrigados soamente ante a entidade beneficiaria, que asumirá a total responsabilidade da execución da actividade subvencionada fronte á administración. ASNAUGA será a responsable de que na execución da actividade subvencionada concertada con terceiros se respecten os límites establecidos neste convenio en canto á natureza e contía dos gastos subvencionables e esixiranlles ás/aos subcontratistas os documentos acreditativos dos pagamentos correspondentes.

Os/as subcontratistas están obrigados/as a facilitarlles aos organismos de auditoría e control toda a información necesaria relativa ás accións subcontratadas.



En ningún caso poderá concertar o beneficiario a execución total ou parcial das actividades subvencionadas con:

- a) Persoas ou entidades incursoas nalgunha das prohibicións do artigo 10 da Lei 9/2007, do 13 de xuño, de subvencións de Galicia.
- b) Persoas ou entidades que percibisen outras subvencións para a realización da actividade obxecto de contratación.
- c) Intermediarios ou asesores nos que os pagamentos se definan como unha porcentaxe de custo total da operación, agás que o dito pagamento estea xustificado con referencia ao valor de mercado do traballo realizado ou dos servizos prestados.
- d) Persoas ou entidades vinculadas co beneficiario, agás que a contratación se realice de acordo coas condicións normais de mercado e que se obteña a previa autorización do órgano concedente nos termos que se fixen nestas bases reguladoras.

#### **Décimo cuarta.- Causas de resolución.**

Serán causas de resolución deste convenio:

- O incumprimento do seu obxecto.
- O incumprimento total ou parcial de calquera das cláusulas que nel se establecen.
- O transcurso do tempo estipulado sen que culminen as actividades acordadas.
- O acordo unánime dos asinantes.
- A decisión xudicial declaratoria da nulidade do convenio.
- Calquera outra causa distinta das anteriores prevista no convenio ou noutras leis.

#### **Décimo quinta.- Reintegro da subvención.**

Procederá o reintegro parcial ou total da subvención nos casos previstos 33 da Lei 9/2007, do 13 de xuño, de subvencións de Galicia e concordantes do Decreto 11/2009, do 8 de xaneiro.



No caso de que se produza exceso das subvencións percibidas de distintas entidades públicas, a entidade beneficiaria deberá reintegrar o exceso xunto cos xuros de demora, nos termos que establece o artigo 23 do Decreto 11/2009, do 8 de xaneiro, polo que se aproba o Regulamento da lei de subvencións de Galicia.

**Décimo sexta. - Publicidade e rexistro do convenio. Autorización e consentimento para que se publiquen os datos persoais e demais especificacións que figuran no convenio.**

En cumprimento do disposto no artigos 18 e 20.8 da Lei 38/2003, do 17 de novembro, xeral de subvencións, comunicárase a subscripción deste convenio á Base de Datos Nacional de Subvencións que opera como sistema nacional de publicidade de subvencións.

Segundo o artigo 17 da Lei 1/2016, do 18 de xaneiro, ademais da información que debe facerse pública segundo a normativa básica en materia de transparencia, a Axencia de Turismo de Galicia publicará o texto íntegro do convenio.

Así mesmo estarase ao disposto no artigo 15 da Lei 1/2016, do 18 de xaneiro, de transparencia e bo goberno, sobre os deberes específicos de información sobre convenios.

Ao mesmo tempo, procederáse á inscrición do convenio no Rexistro Público de Subvencións conforme ao establecido no artigo 16 da Lei 9/2007, do 13 de xuño, e no Decreto 132/2006, do 27 de xullo.

Coa sinatura do presente convenio as partes asinantes autorizan e consenten a publicidade dos datos de carácter persoal e mailo resto das especificacións recollidas no presente instrumento de colaboración no Portal de Transparencia e Goberno Aberto e no rexistro regulado no Decreto 132/2006, do 27 de xullo.

**Décimo sétima.- Protección de datos persoais**



As partes asinantes responsabilizaranse de que calquera tratamento de datos persoais que puideran levarse a cabo en virtude do mesmo se realice con absoluto respecto ás normas de seguridade e de conformidade co establecido no Regulamento 2016/679 (UE) xeral de protección de datos, na Lei orgánica 3/2018, do 5 de decembro, de protección de datos persoais e garantía dos dereitos dixitais e demais normativa concordante.

Os datos persoais dos asinantes deste convenio serán tratados por cada unha das partes co fin de xestionar a súa formalización e desenvolvemento, sendo imprescindible para iso que inclúan os seus datos identificativos, a representación da capacidade que ostenten, e a súa sinatura. A base lexitimadora do tratamento dos datos persoais dos asinantes é o cumprimento dunha misión realizada en interese público baseada na Lei 40/2015, do 1 de outubro, de réxime xurídico do sector público e na necesidade de tratar os devanditos datos para a execución do convenio suscrito. Respecto dos datos persoais sobre os que a Axencia de Turismo de Galicia ostenta a condición de responsable do tratamento, as persoas interesadas poderán solicitar ante esta o acceso, rectificación e supresión, así como opoñerse ao seu tratamento a través da Sede Electrónica da Xunta de Galicia ou nos lugares e rexistros establecidos na normativa reguladora do procedemento administrativo común, segundo se recolle en <https://www.xunta.gal/exercicio-dos-dereitos>. Contacto co/a delegado/a de protección de datos e información adicional en <https://www.xunta.gal/informacion-xeral-proteccion-datos>.

En canto aos datos persoais sobre os que o concello ostenta a condición de responsable do tratamento, as persoas interesadas poderán solicitar da devandita entidade o acceso, rectificación e supresión dos seus datos, así como opoñerse ao seu tratamento a través do enderezo sinalado no encabezamento do presente convenio.

Así mesmo, as partes garanten o cumprimento do deber de información previsto no artigo 13 do RXPD respecto do persoal ao seu servizo, propio ou alleo, cuxos datos persoais sexan comunicados entre as partes para a execución dos seus compromisos.

#### **Décimo oitava.– Notificación electrónica**



Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notifica.gal (<https://notifica.xunta.gal>). Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

#### **Décimo novena.- Vixencia.**

Este convenio entrará en vigor na data da súa firma e terá vixencia ata o 31 de decembro de 2025.

E en proba da súa conformidade, as partes asinan este convenio na data da súa sinatura dixital.

Pola Axencia de Turismo de Galicia  
O director

Por ASNAUGA  
O presidente

José Manuel Merelles Remy

Javier Ruíz de Cortázar Díaz

